

Corpora: non imbres, hyemis non frigora lædant.

Interea, his rudibus mortalia pectora curis
Dum sese exercent, studijsq; frequentibus illis
Intenta inuigilant: dias sub luminis oras
Se prodit solers Industria, paupere tecto
Hæc, laribusq; arctis nata olim, paruula quamvis
Esset, & in cunis recubans composta iaceret,
Somno vnquam paruos vix declinabat ocellos.
Mox, ubi cum pueris cœpit colludere, mirè
Ipsa agilis, manibus paruis, digitisq; tenellis,
Plurima vel madido è limo, vel vimine lento
Fingebat, nunc hæc tractans, nunc illa retractans.
At, postquam sensim, teneris crescentibus annis,
Sollicitam ignaua cœperunt tadia vitæ:
Pauperiem duram fugiens, errare per orbem,
Densis in syluis, solisque in montibus æuum
Degere constituit: oculis perquirere acutis
Singula, scrutari, mirari, mente capaci
Versare abstrusas res, vestigare profundas
Et rerum causas, & quæ Natura creatrix
Alma parens, magna ingenio, admiranda dedisset.

Tandem edocta probè, sortis miserata malignæ
Humanæ, insinuans hominum se mentibus ultro,
Ipsa experta, suas dudum quas repperit artes
Edocet, ingenij & paulatim exercet acumen:
Ignarasque manus operum, insuetasque laborum,
Rebus inauditis, primum & nascentibus aptat.
Scilicet, hinc usu pedetentim exercita longo
Pectora: dein, rerum perquam studiosa nouarum,
Inque dies rebus magis oblectata repertis,
Ingenio ingenium, praeclaris artibus arteis
Exsuperant, nil quidquam intentatumque relinquunt.

Sic genus humanum, rude quondam, obtusaque gestans
Pectora (ceu fera deposita feritate) per arteis
Ingenuas, usu, longa assuetudine victum,
Formatumque aliam vitam, moresque decoros
Accepit, procul abiectis agrestibus, altè
Sapius insita sic, fissis cuneis securiue
Arboris alterius trunco, sylvestria sorba
Exuere agrestes animos, mitescere succos
Conspicimus crudos, acres quiq; ante fuere:

At non tanta quidem quondam mortalibus ipsis
Sufficere hac potuit vel sola industria, namq;
Et clara hæc diua, celsis de culmine Olympi
Delapsa in terras, diuino numine plena,
Monstrauere viam. Thau. sed quæ? namq; aspice, tantum
Conspicio hic vnâ, referat quæ virginis, almæ
Aut Diuæ, aut Nymphæ vultus, dic, ista Panopte

Quæ